

Sviluppà novs servetschs

Il Rintg da maschinas grischun festivescha ses 10avel onn da fatschenta

DAD ANDREAS CADONAU / ANR

■ **Il Rintg da maschinas grischun stat il 2018 en ses 10avel onn da fatschenta. L'organisaziun purila ha schlargià cuntinuadamain ses servetschs che sa drizzan era vers il mastergn. L'idea fundamentala dal rintg è dentant restada. Numnadamain da gidar a meglierar la situaziun economica dals manaschis purils.**

Bunamain diesch onns timuna *Claudio Müller* il Rintg da maschinas grischun, ina organisaziun cun 1300 commembers. Betg main che 60 procent dals manaschis purils grischuns èn da la partida, sco quai ch'il mainafatschenta ha accentuà. Avant passa diesch onns han ins stgaffi la basa per sulet ina organisaziun grischuna ed unì ils rintgs da maschinas regiunals. Müller ha gidà ad instradar la nova organisaziun ed è turnà suenter in onn per surpigliar la gestiun da l'organisaziun grischuna. E sut sia direziun è il rintg da maschinas sa sviluppà considerabel. Müller ha fatg attent dad avair fatg stim spert che la fatschenta da coc dal rintg, l'intermediaziun da lavur cun maschinas tranter ils singuls manaschis, stagneschia. Bain hajan il chantun e L'Agid svizzer da la muntogna sa gidà finanzialmain cun ina contribuziun da partenza. Il rintg da maschinas saja dentant ina organisaziun che finanzieschia sazezza ed uschia haja il rintg stuì generar novas entradas ed augmentar la paletta da servetschs. La filosofia da basa è dentant restada, numnadamain da porscher la pussaivladad als manaschis commembers da recaltgar ulteriuras entradas e reducir expensas. Intermediar personal al

mastergn grischun è ina da las novas spartas da fatschenta, sco il servetsch dal perchasa. Dal chantun Grischun ha il rintg da maschinas surpiglià l'incumbensa da controllar la protecziun da l'aua dals manaschis grischuns, ed el ha stgaffi la basa per la cumpra cuminaivla da divers meds duvrads da l'agricultura per uschia porscher pretschs attractivs. Rimnar folia da ballas da silo è in ulteriur servetsch instradà da curt dal rintg da cuminanza cun ina interpresa da transport.

Administraziun creschida

Perditga dal radius da fatschenta creschi dattan las piazzas da lavur ch'il Rintg da maschinas grischun porscha actualmain. L'entschatta era sulet ina persuna engaschada en l'administraziun, actualmain partan sis persunas 450 procents da lavur. Müller ha discurrì da circa 30 persunas activas da preschent enzanua en incumbensa dal rintg da maschinas. Müller vesa ulteriur spazi d'activitad per exempel en il servetsch d'enviern. En collavuraziun cun ils ulteriurs rintgs da maschinas svizzers èsi reussì da recaltgar ina incumbensa gronda en quel sector. Lavur da rumida da naiv e bittar sal che purs surpiglian. Müller ha menziunà las stentas actualas da dudesch rintgs da maschinas da fundar ina societad acziunara per pudair recaltgar ulteriuras incumbensas pli grondas. La collavuraziun dals divers rintgs è indispensabla per reussir. Ed el vul sviluppà la collavuraziun cun las vischnancas. Gist en il sector da la lavur communal e per sa gidar là nua ch'il personal communal na tanscha betg per dumagnar la lavur. Sin-

gulas vischnancas èn gia commembras dal Rintg da maschinas grischun e Müller ha annunzià tschertas stentas da schlargiar quel commembradi communal. Il gestiunari ha fatg attent a las entradas nà dal commembradi dal rintg che garanteschia in tschert sochel finanziel. Quel na tanschia dentant betg uschia ch'il rintgs stoppian tschertgar novs spazis da fatschenta. La producciun d'energia sin ils manaschis purils è

ina da las tematicas en il focus dal rintg. Il svilup da quel sector è dentant in tschert en vista a la fin da la indemnisaziun federala per cuvrir ils custs da la producciun d'electricitad.

Intermediar lavur cun maschinas

Daco che l'incumbensa da coc dal rintg da maschinas, l'intermediaziun da lavur cun maschinas tranter ils manaschis stagnescha, n'ha Müller betg pudì declarar

exact. Aspects economics pledan numnadamain en favur dal diever da maschinas sur plirs manaschis. Il mainafatschenta dal rintg vesa aspects psicologics e dumondas da la disponibladad che pledian per blers manaschis en disfavur da parter la lavur cun la maschina. Schegea ch'i dettia blers exempels che mussian che la chaussa funcziunia, ha ditg il mainafatschenta dal Rintg da maschinas grischun.



La lavur da maschinas sur plirs manaschis stagnescha ed il Rintg da maschinas grischun ha sviluppà divers novs servetschs. FOTO O. ITEM